



Broj/Број: 01,02-05-230/08
Sarajevo/Сарајево, 9. juni 2008.

IZVJEŠTAJ
sa parlamentarnog sastanka
Novi izazovi za parlamentarnu saradnju u Jugoistočnoj Evropi,
Sofija, 5. i 6. juni 2008.

Na parlamentarnom sastanku pod nazivom Novi izazovi za parlamentarnu saradnju u Jugoistočnoj Evropi, koji je održan u Sofiji 5. i 6. juna 2008, učestvovao je Slobodan Šaraba, delegat u Domu naroda Parlamentarne skupštine Bosne i Hercegovine.

Sastanak je organizovan u okviru Procesu za saradnju u Jugoistočnoj Evropi (SEECF) i u organizaciji Regionalnog sekretarijata za parlamentarnu saradnju u Jugoistočnoj Evropi.

Na sastanku su također učestvovali članovi parlamenata Bugarske, Hrvatske, Rumunije, Srbije, Turske, a bili su odsutni članovi parlamenata Albanije, Grčke, Crne Gore, Makedonije i Moldavije.

Cilj sastanka je bio da članovi parlamenata, nakon što su predsjednici parlamenata 14. aprila 2008. potpisali Memorandum o razumijevanju o parlamentarnoj saradnji u Jugoistočnoj Evropi, naprave sljedeći korak i razmijene mišljenja o dosadašnjim iskustvima i daljem načinu saradnje između parlamenata zemalja SEECF-a.

- **Na kraju sastanka članovi parlamenata su usvojili zaključke koje dostavljamo u prilogu. U zaključcima su parlamentarci predložili uspostavljanje međuparlamentarne radne grupe koja bi u oblasti parlamentarne saradnje u okviru SEECF-a radila na definiranju glavnih prioriteta od zajedničkog interesa. Parlament zemlje koja predsjedava SEECF-om (Moldavija) uputiće ovaj prijedlog državnim parlamentima ostalih deset zemalja na davanje saglasnosti. Parlamentarci su predložili da se međuparlamentarna radna grupa, ukoliko se uspostavi, sastane u jesen u Kišinjovu, Moldavija.**

Teme sastanka su bile:

- uloge i funkcije parlamenata u Jugoistočnoj Evropi,
- regionalna parlamentarna saradnja – naučene lekcije,
- povećavanje uključenosti parlamenata u aktivnosti regionalne saradnje,
- ka snažnoj mreži – budući mehanizmi regionalne parlamentarne saradnje.

Izvodi iz diskusija:

U svojoj prezentaciji Petra Blaess, konsultant za parlamentarnu saradnju, dala je pregled funkcija parlamenta općenito i podsjetila na kriterije iz Kopenhagena, Solunsku agendu i Strategiju Evropske unije prema Zapadnom Balkanu kao dokumente koji se odnose i na parlamente i koji ističu ulogu parlamenata u procesu integracije u Evropsku uniju.

Govoreći o dosadašnjoj regionalnoj parlamentarnoj saradnji Petra Blaess je podsjetila da su u 2007. godini zadaci i aktivnosti Pakta stabilnosti preneseni na SEECP, Regionalno vijeće za saradnju u Sarajevu i Regionalni sekretarijat za parlamentarnu saradnju u Sofiji.

Neven Mimica, potpredsjednik Hrvatskog Sabora i predsjednik saborskog Odbora za evropske integracije, u svojoj prezentaciji je rekao da ima sve više tema u kojima parlamenti mogu pokazati svoj doprinos u radu na evropskim integracijama i na regionalnoj saradnji, ali posebno se mogu istaći *COSAP – Konferencija parlamentarnih komisija za evropske integracije zemalja koje učestvuju u Procesu stabilizacije i pridruživanja* i parlamentarna kontrola CEFTA-e.

G. Mimica je opisao način rada COSAP-a kao prve organizirane mreže sektorskih parlamentarnih komisija u regiji. Ideja COSAP-a je bila da se proces proširenja održi visoko na dnevnom redu Evropske unije, da se dijalog ovih zemalja s Evropskom unijom odvija i na multilateralnoj osnovi, i da se proces evropskih integracija i obaveze iz tog procesa održe visoko na dnevnom redu država regije. Potrebno je prepoznati ulogu COSAP-a u rastućoj ulozi parlamenata u procesu evropskih integracija u regiji. Za sljedeći sastanak COSAP-a g. Mimica će kandidirati za razmišljanje pitanja da li COSAP treba da bude samo za zemlje koje učestvuju u Procesu stabilizacije i pridruživanja ili bi mogao obuhvatiti sve zemlje Jugoistočne Evrope, mogu li se s COSAC-om¹ uspostaviti redovniji odnosi, kako organizirati odnose s Evropskim parlamentom. (COSAC u Evropskoj uniji predstavlja ulogu i glas državnih parlamenata.)

U vezi sa CEFTA-om g. Mimica je rekao da bi se mogli organizirati parlamentarni CEFTA sastanci i da bi parlamenti mogli doprinijeti poboljšanju funkcioniranja CEFTA-e. Dodao je da je potrebno insistirati na tome da je CEFTA regionalna. Kao što su Regionalno vijeće za saradnju, COSAP i Regionalni sekretarijat za parlamentarnu saradnju dokaz kapaciteta zemalja regije, potrebno je da i CEFTA bude dokaz kapaciteta zemalja regije.

Učestvujući u diskusijama g. Slobodan Šaraba je, između ostalog, istakao jačanje uloge parlamenata, posebno mogućnosti doprinosa parlamenata u procesu pridruživanja Evropskoj uniji. Ukazao je na dobre primjere saradnje parlamentarnih komisija za odbranu i bezbjednost u regiji. One su, na primjer, nedavno organizovale regionalnu konferenciju o borbi protiv prirodnih katastrofa. Te komisije mogle bi inicirati i druge teme za razgovore, na primjer, iskustva u reguliranju učešća vojnika u mirovnim misijama i td.

Izvještaj sačinila
Sena Bajraktarević

Slobodan Šaraba,
delegat u Domu naroda

Dostaviti:

- Kolegiju Doma naroda
- Kolegiju Predstavničkog doma

¹ COSAC – Konferencija parlamentarnih komisija za evropske poslove država članica Evropske unije